



наведи телефон

Луимә СЭрипос

24.02.2022
№ 4 (1262)

www.khanty-yasang.ru

Основана 11 февраля 1989 года

E-mail: gazeta@khanty-yasang.ru

Рётың юсвой этпос 23 хоталэ – хум хотпат янытлан хотал!



**Ты
номерт
ловиньтэн:**

Мән мәвт сав
вёраян хотпа ёлы

▶ 3

Ащойкатэ хольт
ёмщакв лусыты

▶ 6

Мирхал хонтлын
мән ялум хум

▶ 8-9

«Югория» ратива
90 тал потырты

▶ 10-11

Няврамыт
тәнки потраныл
ловиньтасыт

▶ 14

Ёлнэ мām урыл

Ты хурит Хальўс район Саранпāвыл мәнщи пыг Артём Ванюта пōслым ёлы. Тав ань армият лусыты. Тав урётыл 6 лōпсыт ловиньтэн.

▶ 15

Нёройка ляпат метеостанция үнттаве

Округ мирколныл тамле ляххал ань тётвес. Ты тал Хальүс районт Нёрт Нёройка ляпат йильпи метеостанция үнттаве, тув 5 млн солкөви тах холтаве.


Мә-вит ханищтан станция ань сака эри. Төва тәлыт сака яныг вит вәри. Түяг ос тув ывылтахтын порат Сакв я сака нөх-өнты. Ты я ватанэ хосыт үнлын павлыт пуссын витн амаравет. Я ляпат өлнэ мэхум коланыл сав хөтал витыт үнлэгыт,

тувыл молях хот-саёгыт.

Тэпкананыл өс ама-равет, картопка тал та хультэгыт. Уйхул өщнэ хөтпат пумкананыл рәк-тыл лап-тотавет ос нәтнэ йывыл ропавет. Ты хосыт мэхум ёмашакв пум вәруңкв ат вөрмөгыт.

Ты метеостанция те үнттаве, тот рүпитан мэхум мäk лавуңкв вөрмө-гыт – тув порат Сакв ят яныг вит вәри ман ати.

Ляххал мәнщи ләтңыг
В. ВАСИЛЬЕВА
хансыстэ



Сакв я нөх-өнтыс, Ясунт павыл

Кит няврам өщнэ щёмьят олныл нётавет

Мән округут өлнэ мэхум «Развитие жилищной сферы» нампа программа хосыт кол өвтнэ олныл таставет. Ты нэпак щирыл кит няврам янмалтан щёмьят олныл ань өс мивет.

Тананылн нётнэ мәгсыл ты тал сыс округ миркол палныл 180 млн солкөви тах холтаве. Мөлты тәлт 300 щёмьят касыңаныл 600 сөтыра солкөвил майвёсыт. Тән ты олны-тыл ипотека манос кол өвтнэ мәгсыл ойтхатасыт.

Программат хансым өлы, мән округут 15 тал өлнэ мэхум ты олныл туп мивет. Щёмьят няврамыг сас тыт самын патсыг ке, ос китыт няврам 2018 тәлт тал котиль этпос өвыл хөталэ юи-пәлт самын ке патыс, тонт өчередин хансавет. Ос нэ манос хум няврамаге таккөт янмалты ке, ты нётмил-олн өс виңкве вөрми.

Кол үнттын округ департаментыт күщай вә-ңын нэ **Яна Щербинина** тох лавыс: «Манхурип нэпакыт акван-атуңкве эри, кол үнттын округ департаментув ищхыпң

лөпсыт ёмашакв хансым өлы. Мэхум ты элы-пәлт мөт программан ке хас-хатасыт, ты нётмилыт ат мивет. Ос щёмьят кол ке өнщас ос тувыл элалы тыналастэ, өчередин өс ат хансаве».

Кит няврам өщнэ щёмьят 2023 тал оигпан мус ты программаныл олныл тох нётуңкве патавет. Хоты нэпакыт эрөгыт, ты департаментыт «Социальные меры поддержки» нампа ищхыпң лөпсэт хансым өлы. Нэпаканыл МФЦ-кол щирыл кетуңкве рөви.

Ты тал өчередин хас-хатам щёмьятн нётнэ мәгсыл 300 млн солкөви тах таставе. Мән округут 500 щёмьят ты олн-нётмил виңкве вөрмөгыт. Тананылн заявлениен-нэпак мәнполь этпос өвыл хөталэ мус хансуңкве тах эри.

Рётың юсвой этпост Москва үст «ПродЭкспо» нампа суссылтап вәрыглавес. Ты мирхал суссылтап касың тал вәрыглаве, тув мә янытыл өлнэ мир тэнутаныл суссылтаңкве ос тыналаңкве тотыгыяныл.

Тән хулныл атың тэнут вәрөгыт

Ты тал тув 30 савсыр мөт хөн мәныл мэхум ёхталасыт. Мән округу-ныл мэхум тув өс ялсыт. Сергей Афанасьев, «Фонд развития Югры» кол күщай, промышленность департаментыт рүпитан хөтпат, Нижневартовск үст «Санта-Мария» нампа хул щёпитан комбинат, Белоярский район Касум павылт сәлы үрнэ совхозт, «Чайный дом» ос мөт савсыр мәтт рүпитан мэхум суссылтапн ялсыт.

Тән пилыл, хулыл, сәлы нёвлит, ләхсыл, пәквсамыл вәрим тэнут Москва үсн тотыгласыт. Жюри-хөтпат щар мäk ёмашакв вәрим ос атың тэнут пөриясыт.

Нижневартовск үст «Санта-Мария» хул щёпитан кол тэнутаныл «Лучший продукт-2022» нампа номинацият тот

нөх-патыс. Суссылтапн тән сыг мәйтыл ос сорх хулныл тәнки вәрум тэ-нутаныл нөх-патсыт. Тот рүпитан хотпат яныт-лавёсыт ос диплом-нэпакыл майвёсыт.

«Санта-Мария» колт рү-питан мэхум хулныл 230 савсыр тэнут вәрөгыт. Тот вәрим пәнкәт ань округ янытыл савсыр үсытт өлнэ ләпкәтт өвтуңкве рөви.

Юи-өвыл тәлыт хулың пәнкәт Китай, Казахстан ос мөт хөн мәтт тынала-вет. Ты элы-пәлт хул щё-питан кол округ миркол палныл олныл тастыгла-вес. Тувыл тән ёмашакв рүпитаңкв ос атың тэнут вәруңкве патсыт, ань олн тәнки сәлэгыт.

Округ мирколныл кётым ляххалыг мәнщи ләтңыг
Людмила ТЕТКИНА
хассаре

Мән мәвт сәв вәраян хәтпа җлы

Росгвардият рупитан хәтпат рәтың юсвой этпос китхуйплов хәталәт җлпың хәталаныл җлыс. Тән палтаныл мәхум үргалым ОМОН ос СОБР полиция хәтпат лусытәгыт.

Ты хәтпат рупатаныл ань маныр йильпи вәрмалит щәпитавәсыт, ты урыл ляххал тотнә колт Росгвардият рупитан кұщай вәңын хум Михаил Клепалов ос писаль җщнә хәтпат уральтан кұщай хум Николай Горбатенко потыртасыг.

Росгвардият рупитан хәтпат сәв мир акванатхатыглан мāt акваг мәхум үргаләгыт. Тувыл писаль җщнә хәтпат, округувт җлнә топливно-энергетический комплексит ос мōт сәв мирн эрнә колыт уральтым җньщияныл.

Михаил Клепалов ләвме щирыл, Югра мāt сәтлов нупыл хұрум сәтыра писаль җщнә элумхәлас җлы. Тан пуссын акваәт яныгсәт хус сәвит писаль җньщәгыт. Тәва хәтпат кит-хұрум писалил җвтхатсыт. Уральский федеральный округув янытыл мән мәвт шар сәв писалиң элумхәласыт җләгыт.

Тувыл ос тәва мәхум писалыныл сунсыглан мәгыс юн җньщияныл. Тән ос тамле писалил вәраяңкве ат тәртавет, сәккон хосыт туп юн җньщүңкве вәрмияныл. Тәва хәтпат мән писалит тәнкинәныл үргалан мәгыс висыт.

Мōлты тәл сыс Росгвардият лусытан мәхум хус сәтыра арыгтем хәтпат уральтасыт, тән писалыныл кәр хусапт вос җньщияныл. Ты хосыт аква сәтыра атсәт сәвиткем элумхәлас осн-паттысыт, тōнт пуссын акваәт аква

сәтыра сәтсәт сәвит писаль хот-вуйвес.

Ань писаль җщнә хәтпат тәкыщ уральтавет. Ты вәрмалы мәгыс сәккон рупиты. Писаль ләльсаң җщнә хәтпат яныг штрафыл пинавет, тәват ос писалыныл хот-вивет. Ты сәккон палтаныйильпи ләтың хасвес.

Пәс вәрмалы щирыл мәнлат хәтпат нәловхуйплов тәланыл тәвлын порат писаль җвтуңкве вәрмысыт. Ань ос вāt нупыл аква тәл яныт хәтпатн ущ писаль җвтуңкве рәви.

Михаил Клепалов ләвыс:

– Йильпи тәл җвыл-тахтам пәсныл җс аква

әмас вәрмалы щәпитавес. Хоты элумхәлас нәмхәт җл ат хансым писаль юн җньщы ке, тәве Росгвардия колн тотуңкве вәрмитә. Тувыл ань янас писаль щәңквыт, куратан утыт (взрывчаткат), сәлят, саквнялыт, сәвсыр патроныт җс тән палтаныл миңкве рөвәгыт. Писалит экспертиза хосыт әмщакв уральтавет, ты писалил нәматыр җвыл ат ке вәрвес, хәтпа сәт сәтыра атсәт сәвит солкөвил ойтавет тах.

Хотыт вәрт писаль хәнтыс ке, тав җс Росгвардия колн тотуңкве вәрмитә. Тот ты писаль әмщакв уральтаве, хәтпа тув нәматыр вәрмалы ат ке җньщы, тав җс нәматарыл ат вәрәве. Писалит Росгвардия колн лицензионно-разрешительный рупата вәрнә хәтпатн манос полиция колн нән тотән, тот пирмайтавет.



Вәраян хумыг үнлаҳләг

Юи-җвыл тәлытт тәва хәтпат хәт-әти писалил пәтлуптәгыт, ты паттат сәв элумхәлас порславес. Ань округувт җлнә школат пуссын әмщакв уральтавәсыт, тот сәвсыр ищхыпың утыт вәрим вос җлыс, пōх хәтпа тув ул вос щалтыс. Ань Росгвардият лусытан хәтпат школат уральтым вәтихал яласәгыт.

Тән школат ос яныг ләпкат әвисүнтыт мәхум уральтан (охрана) хәтпат рупатаныл җс уральтыяныл. Ювле хулытум тәлт яныгсәткем охрана вәрнә хәтпат ләльсаң рупитаманыл мәгыс штрафыл пинвәсыт. Тән акваг тох ләльсаң рупитанкве патәгыт ке, элалы лицензия-нәпаканыл хотвиңкве вәрмаве.

Николай Горбатенко ос топливно-энергетический комплексит үргалан урыл потыртас. Тав ләвме щирыл, округувт китсәт сәвит тамле кол җлы. Ты мә-вөй ос газ нōхвинә мāt, электростанция, мә-вөй овтнә кәртурыт, компрессорный станцият ос мōт колыт уральтым җньщавет.

Тәва тот рупитан кұщай хәтпатн Росгвардия мәхум нәпакыт хассыт, ты вәрмалыныл мұсхалыг вос щәпитасаныл. Мōлты тәл налыман арыгтем тамле предприятият штрафыл пинвәсыт.

Кұщайг җс аква тәла урыл потыртасыг. Мәхум вәраян мәгыс җвтыт ос нәлыт җвтуңкве җс вәрмәгыт. Тәкнүве җвт мәгыс җс разрешение-нәпаквиңкве эри. Ос мән мәвт җлнә хәтпат тамле ут иң нәмхотыт ат җвтыглас, мәхум пуссын писалил алыщләгыт.

Николай МЕРОВ

Халынт нётхатым олэн

Советский районт «Югра лылыёп» общественный рупата вэрнэ колт пуңк кўщаиг В. В. Вискунов олы. Мош мблалнуб «ВКонтакте» ишхйпың мат потре ловиньтаслум.

Тав Барышников тит ягпыгы урыл тот хансыс. Тавён свонитасум, ты хотпаг урыл титыглахтасум. Виктор Витальевич тох лавыс:

– Ты вбраян маныщи хумыг – Михаил ос Александр Барышниковыг. Сат тал мидам порат Пионерский павылт тэн колэн улян ёсвес. Ты юи-палт тэн вёрколэнт олсыг, олнэ матэн Алябеево павылныл яныгсат верыстатемыг элн олы.

Тэн колыл вос мивёг, тэнатэн 2020 тал пасныл нётуңкве патсум. Миркол кўшаин яныг пумащипа латың лавёгум, тав наме Венера Сагитовна Зубчик.

Ты тал тал котиль этпост ягпыгы Пионерский кирпащ колт квартирал майвесыг. Тэн вёрныл юв ёхтысыг, кол нэпакыт щёпитаңкве ос колэнт матыр рупата вэрнэ магыс. Ты торыг вёрколэн ос улян тэйвес. Тамле вэрмалты олыс. Тот люль нак ёмтыс, хурум манылат

пыгыт порсысыт. Акв пыг тэн рутэн олыс.

Михаил ос Александр Барышниковыг павылт ань лильпи колт олэг. Пормас щар ат ошсыг, пормас тал титынтыг хультсыг. Таимэгыс «Югра лылыёп» общественный рупата хосыт мән тэна-тэн пормасыт, аны-саныт атсүв, тотсанув, мисанув.

Маим колэн ёмас, рёгың, хумыг номтанэн ёмас. Туп сыманэн вөрн хартавёг, мошёрт вбраяңкве минэг. Колэнт рутэн хультуптэг, тав тит савалап ныврам янмалты, посың, рёгың колт тән вос олэгыт.

Мән маныщи хотпанув тох ты олэгыт, аномн ёмас, ам ляпамт олнэ хотпанумн ос вос ёмасыг паты. Воссыг маныр лавуңкве, пуссын пустэгыл вос олэгыт.

Виктор Вискунов
потре **Светлана**
ДИНИСЛАМОВА
маныщи латңыл хансыстэ



Барышников ягпыгыт



В.В. Вискунов хумн пормас тотыс

Хум олупсатэ

Рётың юсвой этпос 23 хоталэт – хум хотпат янытлан хотал. Ёмас латың Виктор Витальевич Вискунов урыл лавёв, таве мош эсгилүв. 2013 талныл 2016 тал мус тав Советский районт «Югра лылыёп» организация кўщаиг олыс.

Овыл тал рупитамёт такви олнытыл ныврамытн Лильпи тал кастыл яныгсаттем атың мүйлупсат ёвтыс, касың мүйлупса

тит мандариныл нётыстэ, лави:

– Ты тэп атэ мәнь пораныл номилум, щагтум номилум, хунь Лильпи тал овылтахты. Таимэгыс ныврамытн мүйлупса вэрёгум. Ётылнуб «Газпром» ёт потыртахтасум, ань тән касың тал Советский районт олнэ сossa мир ныврамытн мүйлупсат ёвтыглэгыт.

Виктор Витальевич «Олимп» нампа колт



кўщаиг рупиты. Рупата кол пөхат мир пумщалан магыс «Этностойбище» вэрыс. Мащтырыг вэрим

сумьяхыт, хэпыт, суныт тот олэгыт. Няннь вэрнэ кўр Зоя Никифоровна Лозямова тав пөщгистэ.

Ялпың хотал кастыл хумн тох лавёв: «Элалы ос сав ёмас вэрмалы мирн, маныщи хум, вэрен. Ёмас вэрмалянын магыс Советский районт олнэ махмытн наң вавен, мир нупыл ёмас суснэн магыс янытлавен. Пус кат, пус лагыл олэн, Виктор Витальевич!»

Светлана САДОМИНА

www.khanty-yasang.ru



Пуссын аквторыг хайталтасыт



Евгений Дементьев янытлаве

Мәхум товтыл касэгыт

Россия мә янытыл өлнэ мир кәсың тәл рётың юсвой этпост акв ушлахтын хөталт товтыл аквторыг хайтуңкве ос касуңкве акван-атхатыглэгыт.

Ты касыл руш ләтңыл «Лыжня России» ләваве. Таве 1982 тәл пәсныл вәрыглаве. Ты тәл мәхум налыманыттыг товтыл хайтуңкве патэгыт.

Мән округут ты касыл хоты вәрнэ, сәв мәхум тув вөвыглавет ман әти, ты урыл «ЮграМегаСпорт» намба колт күщай вәңын хум Олег Дресс ляххал тотнэ мәхумн потыртас:

– Юи-өвыл тәлыгт коронавирус әгм мәгсыл сәв мәхум акв мät ул вос атхатэгыт, округут

өлнэ мир сәвсыр порат касуңкве вөвыглыянүв.

Ос ты элы-пәлт мәхумн ищхйпың утыт «ЮграМегаСпорт» лөпсыт товтыл хайтнэ мәгсыл хасхатуңкве эрыс, тонт тән кентыл ос номерыл мивет.

Мөлты тәл 16 районытт ос яныг үсытт ты касыл вәрыглавес, тонт аквты этпос сыс лов сөтыра хөтпат товтыл хайтсыт. Ты тәл 12 сөтыра элумхблас касуңкве хасхатасыт.

Тамле касыл акваг вәрыглаве. Ань Россият

өлнэ сәвнүв мәхум товтыл вос хайтыгтэгыт ос пустәгыл элаль вос өлэгыт. Касуңкве кәсащан хөтпа таккөт хайтуңкве ос ты урыл кина ос хурит пөслуңкве вөрмыс.

Хотыют тох вәрыс, тән пуссын тәнки кинаныл, пөслум хурияныл ищхйпың ут хосыт «ЮграМегаСпорт» колн кетсаныл. Олег Дресс ләвыс, тән ты кинат, хурит халт нөх-патум хөтпат пөриясыт ос мүйлупсал мүйлуптасаныл.

Ханты-Мансийск үст касыл рётың юсвой этпос 12 хөталэт А.В. Филипенко намыл маим центрыт өлыс. Та хөталт 260 спортсмен-хөтпат товтыл тәнки халанылт кассыт.

Төват акв вөрыстакем, мөтаныт хұрум ос ат вөрыста хайтсыт. Хұрум дистанцият нөх-патум хөтпат диплом-нэпакыл ос мүйлупсал майвөсыт.

Евгений Дементьев, Олимпиадат нөх-патум хум өс касыс. Тав өвыл места та вис. Үст өлнэ мир касыл сунсуңкве тув вөвыглавөсыт. Тонт ащирмаң хөтал өлыс, товтыл хайтнэ хөтпат

ос мүйлын мәхум тот тыттувөсыт ос исум щәил айтвөсыт.

Ханты-Мансийск үст өлнэ сосса мәхманув, «Югра лылыөп» намба организация рүпитан хөтпат кувцил ос хорамың сахил масхатым кәсың тәл ёсал өс хайтэгыт. Туп ты тәл корона-вирус әгм мәгсыл касуңкве тув ат ялсыт.

Ты этпос 12 щислат Нягань, Урай, Радужный үсытт ос Нижневартовский, Белоярский районытт өлнэ мир товтыл өс хайтсыт. Мөт районытт ос яныг үсытт мәхум тәнки халанылт мәнполь этпос 12 хөталэт тах касэгыт. Нефтеюганский ос Октябрьский районыгт ты этпос 19 щислат мир товтыл хайтсыт.

Белоярский районт касыл өлум мән район миркол күщай Сергей Маненков ёхталас. Тав мәхум ёт пащалахтас, ёмас ләтңыл ләвсанэ ос та юи-пәлт такви тот товтыл хайтыс. Та каснэ мät нөх-патум хөтпат пуссын янытласанэ.

Людмила ТЕТКИНА



Ащойкатэ хольт ёмцакв лусыты

Хурит Артём Ванюта пöслым блы. Ты хуритэ ань Хальүс район Саранпавылн омаге-а́тяге палт кётыстэ.



Именомец Савелий Вьюткин иэни он порочивает нарисован на СНИМКЕ: передовой вни
ЗА РОДИНУ
стр. 3 сентября 1964 г.

Тамара Савельевна Ванюта, ома́тэ, Сүкырья павылт школат ос ма́нь няврамыт үрнэ колт пуңкотнэ нэг рүпиты.

Тав пыккё́тэ урыл тамле латың хансыс: «Артём пыгум 2016 талт Саранпавылн школа а́стлас ос Тюмень үсн минас. Тот аграрный университетыт «водные биоресурсы» вәрмалит ванэ ос

рүпитан хөтпаг ханищтахтас. Мөлты талт университет а́стластэ ос ущнув армиян вуйвес. Тынакт пицма ос хури кётыс, тав десантный войска́т связэ щирыл лусыты.

Лусытан талэ ёмцакв вос олнув, тав ма́гсылэ ма́н сыманув щя́ргёгыт. Ты кос ва́глум, тав та́ксар хум хөтпаг блы, юн акваг нё́твёсум. Тувил ху́л алыщлым ос вёраим яласанэ́в порат акваг ё́т тотыгласлу́в.

Ам а́тям, Артём ащойкатэ, Савелий Вьюткин бс армиян тотыглавес. Тав



ма́ньлатыг олме порат хумыт кит тал лусытым тотыглавёсыт. А́тям зенитчикыг блыс, тав аква́ёт лусытам ма́хманэ ё́тма́кыг ва́рнэ тэланыл ма́гыс пöслувёсыт ос газетан хансыг лалвёсыт. Нанан ты хуриг суссылтан ма́гыс бс кётыягум».

Ма́н, газетат рүпитанум ма́хум, хум хөтпат тал ялпың хөталаныл кастыл янытлыанүв, пус кат, пус ла́гыл вос олэ́гыт, Най-О́тыранылн вос үргалавет.

Тамара МЕРОВА



Хоты рүпата нанан артми – нэпакт хансэ́н

Рүпата тал блнэ ма́хум манос мө́т рүпата тиснэ хөтпат ма́гсыл «профессиональная ориентация» лавнэ а́рталап «Ханты-Мансийский центр занятости населения» колт вәрвес.

Ма́хум тув ё́хталаңкве манос ищхыпың ут хосыт титыглахтуңкве вёрме́гыт. Тот та́н потыртавет, манхурип рүпата ань блы, хоталь виңкве вёрмавет, та́нанылн ты рүпата хөйхаты манос а́ти. Са́выңпалэ ма́хум ань олн сэлнэ нупыл сунсэ́гыт, мощчал ойтнэ рүпатан ат вуйхатэ́гыт, та́рвитың рүпата ва́руңкве бс ат таңхёгыт.

Тув ё́хталэ́н, тот суссылтавё́н – хотты рүпатан хөтпа ханищтахтуңкве вёрми, ты кастыл ос програмат та́стым олэ́гыт. Пуссын ты вәрмалит э́лумхблас ма́гыс олн ойттал ва́рвет.

Ты кастыл заявление хансуңкве ос тув ялуңкве вёрме́гыт: Ханты-Мансийск үс, К. Маркс үсхулы, 12 кол, №1 колнак.

Ты ищхыпың лө́псын хаснэ ма́гсыл адресэ тамле: <https://job.admhmao.ru>. Тот «граждана́м» латың хөнтэ́н, тувыл э́лаль «услуги гражданам» – «организация профессиональной ориентации граждан» – «получить в электронном виде» – «войти через Госуслуги» – «сведения о заявителе» – «сведения об образовании» – «требования» (та тйвырт 1. «согласен на проведение тестирования с целью» пöс V аква́т ту́щтыгпаңкве э́ри; 2. «Ханты-Мансийский центр занятости» пöс-

туңкве, э́лаль «начать тестирование» ос юи-бвылт «подать заявление».

А́рталап ос заявление хасмы́н юи-палт аква́ хө́тал ювле хульты, то́нт на́н хансум рүпатан аква́ ищхыпың лө́псыт, «обращение» латың хансы́м ма́т «личный кабинеты́т» сунсэ́лы́н. Тот тах ханса́ве, хоты рүпата нанан а́ртми ос маны́р э́лаль ва́руңкве э́ри.

Ты телефон хосы́т свонитэ́н: 8(3467)32-21-88 (115).

Ля́ххал ма́ньщи латңыг **Г. КОНДИНА** толмащластэ

Мәһһи пьг армиян вуйвес

Мәһһи пьг Егор Хозумов туи армиян вуйвес. Екатеринбург үст «Радиоэлектронные войска» мәт лусыты.

Аһ хум хөтпат яһыт-лан хөтал ты ляпамас, ты кастыл Егор оматэ ёт хөһтхатыгласум, китыглахтасум, пьге хумус лусыты, пищма юв улпыл хансыглы манос свонитәлы. Оматэ Надежда Борисовна ләвыс:

– Мәһһ пьгум Егорум лусытаҗкве мөлты тәл туи, бөйттур этпос 5 хөталәт, вуйвес. Екатеринбург үсн ликмыс, тот рәтива хосыт потыртан войскал лусыты, ханищтахты. Ләви, Хәльүс районныл тактөт өлы, акв пьг Нижневартоск үсныл ёхтыс, юртыҗыщ өлэг, потрамөг.

Егор вәт сәграпнал этпос 16 хөталәт 2001 тәлт Хөрыҗпәвылт самын патыс. Тав питипатта пьгум, мәһһ тәгыл Ййкваркаг ләвилүв. Яһыг пьгум Саша, тав юи-пәләт Людә әгим самын патыс, Коля – котиль пьгум, тувыл Вика ос Егор.

Ойкам Анатолий Егорович Хозумов Хөрыҗпәвыл хум өлыс. Мәһһ өвләт тот өлсүв, тувыл Саранпәвылт өлнә колыл майвесүв, тув вәһтылсүв. Ётыл ойкам әтимиыг ёмтыс, һявраманум амттем яһмалтасанум. Школа әстламаныл юи-пәлт, элалә ханищтахтасыт, аһ пуссын Ханты-Мансийск үст өләгыт, рүпитәгыт.

Яһыг ос котиль пьгагум өс лусытасыг. Сашам 2012 тәлт вуйлувес, Саратов үст өлыс. Колям мөлты тәл армияныл ёхтыс – Забайкальский край Чита үст лусытас. Туи, хунь Егор вуйвес, тәлохса кит пьгагум аквторыг лусытасыг, тувыл

таквсы котиль пьгум юв тәртвес.

Ойкам Тамара әще хүрум пьганә – Серёжа, Иван ос Алексей өс пуссын армиян ялсыт, аһ Ханты-Мансийск үст өләгыт, рүпитәгыт.

– Егор школа әстламе юи-пәлт элалә хөт ханищтахтас?

– Белоярский колледжит автомеханикыг хүрум тәл ханищтахтас, машинат ёт рүпитаҗкве паты. Ханищтахтын мәһһ ущ пөйттыс, тәра армиян та әлмаявес. Тыт тай рүпата өлы, яһыг үс капай, юв ёхты, рүпата хөһты. Хәльүс район яһытыл өлнә пәвланувт мәһһлат мәхум рүпата хөһтуҗкве ат вөрмөгыт.

– Пьгын ёт телефон хосыт потыртәгыһ манос пищма хансы?



Егор лусытан мәт пөслым өлы



Е.А. Хозумов

– Аһ телефоныл потыртәв, пищма ат хансы. Каҗкаге тай хансыгласыг. Ләви, лусытан пьгыт ёт юртыҗыщ өләгыт, вори ат тотәгыт. Тәһутыл пөйтнәг тыттавет, ёмас маснудыл майлавет. Ат кос пөлявет, сыманыл ат әтгалавет, нас юв таҗхөгыт, мөт мирыҗ мәт өлуҗкве марщум.

– Надежда Борисовна, һявраманын тәһти ләтҗаныл вәганыл?

– Аһ мөрсыҗ һяврамәһһи ләтҗаныл потырты,

тәһ өс аквтох торгамтәгыт кос, ос ювле рущ ләтҗаныл ләвөгыт. Щащөкваныл хоса өлыс, тав туп мәһһи ләтҗаныл потыртас. Ам өс увщиянум, рүтанум ёт халувт акваг мәһһи ләтҗаныл потыртәв, мәһһтәгыл хүлыгласыт, таимәгыс вәганыл щәһ ләтҗаныл.

Ам омам Татьяна Павловна, такви өпарищнаме Ромбандеева, Мувыһнтес пәвылт самын патыс, Хөслөхт яһыгмас. Тав колтәгыл мәхманә ос пәвыл мир атхунь пуссын мәһһи ләтҗаныл потыртасыт. Атям Борис Николаевич Албин Лөпмус пәвыл хум өлыс, тот өс мир туп щәһ ләтҗаныл потыртасыт, мәһһ тәһ халанылт ты яһыгмасув. Таимәгыс аһ һявраманув ханищтыһнүв, тәһти ләтҗаныл ул вос ёрувляяныл, пөс пора өлупса вос вәганыл, вос пүмщалыяныл.

Надежда Борисовнан потре мәгыс пүмщипа ләтҗы ләвөгум. Армият өлнә пьге пустәгыл вос лусыты. Нявраманә ос апыгрищанә пус кәт, пус ләгыл вос өләгыт, Нәй-Отыранылн вос үргалавет!

Светлана
РОМБАНДЕЕВА



Пётр Ромбандеев



Пётр нэпаке



Мәгыл пөсэ

Мирхал хөнтлын мән ялум хум

Ты э́тпос 23 хөталэ́т хум хө́тпат ялпың хөталаныл о́лыс. Ты кастыл мән Ханты-Мансийск үст военный частит связистыг лусытан ма́ньщи хум урыл хансэ́в. Тав наме Пётр Валерьевич Ромбандеев, Хальүс район Лбпмус павылт 1988 тәлт самын патыс. Тав такви олупсатэ́ ос ляпа рүтанэ́ урыл мән китыгласлүв.

Пыг ханищтахтын поратэ

Тав о́вил классын Кульпас павыл школан тотвес. Тот атыт класс а́стлас ос э́лаль Ханты-Мансийск үс «Искусство Центр» нампа лүймә няврамыт школан кетвес. Округныл савсыр үсытныл ос павлытныл олнэ няврамыт тот ханищтавет. Пыг та школат онтолов класс а́стлас.

Тувыл э́лаль о́с аквта школа нупыл хансым колледжит ат тәл ханищтахтас. Та юи-пәлт ос пәвлэн минас. Тот моц о́лыс ос Ягрим павыл колледжин автомеханикыг ханищтахтуңкве патхатас. Тувыл э́лаль ос Ханты-Мансийск үс колледжин нэпаканэ кетсанэ. Нэпаканэ тув вуйвөсыт, 2008 тәлт

ханищтахтын ма́ныл та а́стлас.

Элы мät лусытас

Та юи-пәлт 2009 тәлт армиян вуйвес, Орёл үсн связистыг лусытаңкве тотвес. Та үст нила э́тпос ханищтавес ос э́лаль Москва үсн кетвес. Тот «МЕТРО» нампа нәиңтуйтыт сав мир ма́ ёлыпәлт тотыглэ́гыт, та ма́хум үргалас.

Төванакт футбол манос хоккей ёнгын мät каснэ ма́хум үргалаңкве кётыглавес. Ялпың хөталыт ма́хум мұсхал щирыл вос үщлахтасыт, тот о́с сунсыглахтым люльсыт.

Тувыл Москва үс котильт олнэ Выгыр кант (Красный площадьт) йильпи тәлт мүйлын хөтпат ос 9 май - Победа

хөталт ма́хум үргалас.

Аквматнакт ма́хум үргалым патрульт ёмыгытматэ, кәсалас, акв э́лумхөлас матаре хотум ёмтыс, тав ёл-патыс. Ма́ньщи пыг молямтахтым тав палтэ хайтыс, о́влэт лылытэ нэ́гылттастэ, тувыл лёккарыт вөвыс, хөтпа пүльницан тотвес. Төнт армият лусытан командирын Пётр сака янытлавес.

Пётр 2010 тәлт армияныл юв ёхтыс, Ханты-Мансийск үс колледжит «Мастер производственного обучения» нампа тэлан э́лаль ханищтахтас.

Та юи-пәлт 2013 тәлт Пётр Валерьевич Ханты-Мансийск үст контракт щирыл «Радиотехническая связь» армиян лусытаңкве патхатас.

Тав армият тамле мät ты лусытас, ты тэла ёмщакв вәгтэ, тымәгыс тәратув вуйвес. Тән ниласәткөм вөрыстат э́лын тыгле-тувле яласан товлыңхәпыт ищхйпың ут хосыт сунсыяныл.

Ты армиян Россия янытыл савсыр ма́ныл ма́нылат пыгыт лусытаңкве тотыглавет. Пётр тәнаныл связэ вәрмалын



З.П. Хозумова, Р.Я. Ромбандеева ос О.А. Алгадьева

бс ханищтыянэ. Тот ань мощца хөтпа лусыты.

Рүпататэ щирыл сәв мәтт яласас

Пётр Валерьевич ты армият лов тәл лусыты. Лусытан мәнанылт акв тәланыл - тәл ос хөт эт-пос сәвитыг ловиньтаве. Ты тәлыт сыс сәв мәтт яласас. 2019 тәлт тав Норильск үсн нётмил рүпата вәруңкве ялыс. Тот мә-вит порсыл хот-сыстамтасаныл.

Тувыл 2020 тәлт мәньщи хум тав ётэ лусытан хөтпатэ ёт Сирия республикан кётыглавес. Тонт хөтахкем мөт хөн мәныл блнэ сәлтатыт тув ёхталасыт.

Тот Россия мәныл блум сәлтатыт тәнки халанылт кассыт, мөт хөн мә сәлтатыт тәнки халанылт бс кассыт. Та порат мәньщи хум рүпататэ ёмщакв вәрме мәгыс мәгылн тагатаган хурум пбсыл майвес ос янытлавес.

Каснэ мән ялум тәла урыл Пётр Валерьевич тох потыртас:

«Ты каснэ вәрмалын тыммагыс кётвёсум, ам сартын кит щёс Бурятия мән ялсум. Тот мәнки армиянув халт бс акв тамле касыл вәрыглавес. Тонт ёмщакв рүпатам вәрнэм мәгыс бс сака янытлавёсум.

Ос ювле ёхтумум порат мән армиявт лусытан командирув а́нум мөт хөн мән ты кётыстэ. Тувыл ювле хультум тәлт ос Астраханский областин касылын ялсум».

Пётр Валерьевич мәньщи ләтың вәгтэ кос, ос потранэ ёмщакв ат тәлэгыт. Омаге-әтяге сә мәньщииг, колтәглыл пуссын мәньщи ләтңыл потыртасыт. Янгыг ёмтыс, сәвыңпәлэ руц ләтңыл потыртаңкве патсыт.

Омаге-әтяге урыл потыр

Атятэ Валерий Васильевич Ромбандеев, хум блмёт Белооярский үст сварщикыг ханищтахтас. Та юи-пәлт Лөпмус пәвылт нәйпос вәрнэ станцият рүпитас. Ётыл хул алыщлан пиркәта ёт яласас. Валерий Васильевич 1996 тәлт а́тимиыг ёмтыс.

Оматэ Римма Яковлевна Ромбандеева Лөпмус пәвыл пүльницат ма́хум пусмалты. Лөпмус пәвылт китсәткөм э́лумхөлас о́лы. Яныг, мәнь хөтпат вәтихал а́гмыл ёмталэ́гыт. Римма Яковлевна тәнаныл пусмалтым сәв тәл рүпиты. Ань тав Александр пыгөн нётаве.

Матахмат тәл ювле хультум порат Лөпмуст йильпи пүльница пүсвес. Колнаке посың, э́рнэ тэрпит тыналавет. Пәвлың ма́хум матыр а́гмыл ёмтэ́гыт, тәра тув ёхтэ́гыт, тот тән нётавет.

Пүльницан э́рнэ тэрпит туи я хосыт, тәлы ос ма́шинал яласан ләңх хосыт Хәльүс район пүльницаныл тотавет. Э́лумхөлас матаре шар люлиг ёмты ке, тав ма́гсылэ вертолёт вб́ваве, руц щирыл «санбо́рт» лә́ваве.

Вертолёт иснэ ма́гыс тот састум ма́ щёпитым о́лы. Турман порат вертолёт иснэ ма́гыс мувлахил нәй пә́ламтаве, ты вәрмал сака ёмас.

Пәвылт сәвыңпәлэ хөтпат вб́раёгыт ос хул алыщлэ́гыт. Тан ащирмат вәтихал пө́лтыглахтэ́гыт, ты паттат а́гмыл ёмталэ́гыт.

Римма Яковлевна лә́выс:

– Ма́хум да́вление а́гм манос сым-а́гм тэрпи акваг китыглэ́гыт. Тыимагыс



Лөпмус пәвыл



Не́ля нэ́квет ёт ю́нсхатэ́гыт

тамле тэрпит сәвну́ве тә́стэ́гум. Ня́врамыт кон хә́йтыгтым кә́таныл-ла́гланыл сылта́глэ́гыт, ме́н пыгме́нтыл ню́лмияныл хот-сы́стамтыя́нме́н ос ма́рля тб́рыл ла́п-пе́рия́нме́н. Э́лумхө́лас сака тәрвит а́гм ат ке бньщи, ме́нки пусма́л-тыя́нме́н.

Ат ня́врам яны́гмасы́т

Пётр яныг увщитэ Не́ля Валерьевна Ханты-Мансийск үст о́лы. Хум вәрыс, кит ня́врам я́нмалты. Нэ́ «Тб́рум Маа» музейт сосса мир пёс йис пормасыт акван-атым рүпиты.

Тав ёлы-пәлэ́т Алекса́ндр, хум ань Лөпмус пә́выл пү́льницат ома́тэ ёт рүпиты. Тот нэ́ тотыс,

ань ня́враманэ́н ёт я́нас колт блэ́гыт.

Тувыл Пётр такви, тав ёлы-пәлэ́т ос Щё́рки, хум Ханты-Мансийск үст почтат рүпиты. Ма́ниг Макси́м о́лы, тав ос Ханты-Мансийск үс колледж а́стламе юи-пә́лт кол у́нттын ма́н рү́питаңкве патхатас.

Мәньщи хумн ос тав рү́танэ́н ам яны́тлан лә́тың лә́вёгум. Пётр Валерьевич Ромбандеев армият лусытым рүпиты, тав мирув у́ргалы, лә́ви, пуссын пу́ста́гыл вос блэ́гыт, халанылт нэм-хуньт ул вос хө́нтлэ́гыт.

Никола́й
МЕ́РОВ

«Югория» рәтыва 90 тәл потырты

Ханты-Мансийский округ блнэ мэхум рәтыва хосыт потыртан суге щар бвыл щёс 1925 тәлт яныг таквс этпос сәтыт хөталэт хунтамласаныл.

Самаровский райком РКП(б) мāt рупитан кӯщайт рәтыва хусап Народный дом нампa кол пōхат тагатаңкве лāvсыт ос тōнт сāv мэхум Москваныл потыртан ляххалыт аквторыг хунтлысыт. Ётыл ущ янас рәтыва кол унттувес.

1932 тәлт ретың юсвой этпос вāt нупыл атыт хөталэт Остяко-Вогульский национальный I Съезд рупататэ бвылтаме порат тув атхатам хөтпат ос Самарово (ань Ханты-Мансийск үс) блнэ мэхум рәтыва хосыт тамле ләтың хунтамласыт: «Округ рәтыва-газета потырты». Тувыл та пāсыл округ рәтыва хосыт ляххалыт ловиньтаңкве патвёсыт.

Ты накт «Югория» нампa рәтыва кол рупитанэтэ 90 тәлэ тōвлы. Аквта намыл пиным телевидение рупитан колн 2021 тәлт вāt сәграпнал этпос бвыл хөталэт 30 тәлэ тōвлыс. Ань ты колт рупитан мэхум ёт хөнтхатыггләлсум ос сāvсыр тәлат бвылтыт тәнаныл китыгласанум.

Татьяна Мерова 1995 тәлныл «Югория» нампa колт рупиты. Өвлэт тав рәтиват руц ләтңыл ляххалыт потыртаңкве патувес. Ётыл сосса мэхум блупсаныл бвылтыт янас суссылтан щёсыт вәрвёсыт ос тав телевиденият мәнъщи ләтңыл программат щёпитаңкве патыс. Ань рәтиват рупитам поратэ урыл а́нумн таи потыртас:

– Ам «Югория» нампa компаниян ёхтум бвыл хөталум ёмщакв номилум, ты яңк нәтнэ этпос атыт хөталэт рәтыва рупитан колн щалтсум. Тот Нина Николаевна Копнова пуңктотнэ нэг блыс, тав а́нумн лāvыс: «Татьяна, мән үсувн Еремей Данилович Айпин ёхтыс, тав



Ирина Ахмедован, тав ётэ рупитан нән, ос «Югра лылыёп» нампa сосса мэхум ассоциация колныл ёхталам нән нётвёсум. Ирина а́нумн Еремей Данилович бвылтыт мощ потыртас ос мән аквьёт китыглан эрнэ ләтңыл щёпитасүв. Тувыл китыглахтамум порат Еремей Данилович а́нум лāvыс, мощ суиңыг вос потыртасум, ләтңанум суйтәлыг блэгыт. Та щирыл ам бвыл потыр рәтиван та хассум.

А́нумн Алексей Михай-

лович Сенгепов эрнэ ләтың акваг хултыглас. Тав матахмат тәл рәтыва мāгыс ханты ләтңыл ляххалыт щёпитас, таимāгыс сāv тәлат вәнэг ощсанэ. Ам тәл охса рупитанэм сыс мәнъщи ос руц ләтңыл финно-угор рут мэхманув бвылтыт передача вāрыгласум. Алексей Михайлович тәнаныл пуссын хунтлуманэ ос а́нум эсгыстэ. Тōнт тав Ас-угорский институтт рупитас ос такви хансум нэпакёт кәтпосыл хасхатас ос а́нумн мүйлуптастэ.

Рәтиват аквьёт рупитам мэхманум бвылтыт туп ёмас сымың ләтың лāvёгум. Мән пуссын юртыңыщ рупитасүв, звуорежиссёрыг Ольга Майер ос Фаина Евсеева мәнавн хултыгласыг, хөт вёщкатыг, хөт суиңыг потыртаңкве эри. Хащтәл мирыт халт рупитанэв сыс нэмхотьютын ат лявильтәлвесүв, нэмхуньт люль ләтңыл ат намталавесүв.

Мәннүв порат юн блмумт округ ляххалыт Вячеслав Керамович Аскеров турсуил хунтлысанум. Ам акваг номсысум, тыи ул лувыңсамың карс бйка, Ю.Б. Левитан хурип, аквтох тākыщ турсуил потырты. Тувыл тыт бвыл щёс кāsаласлум, я-а, мощ урум, талква элумхōласыг блнэтэ. Ос нас потыртанэт порат такем тākсар хөтпаг хулхаты. Мән ётув пашалахты, тувыл кампёткал маяпавёв, матыр эсгын ләтңыл лāvавёв. Мән тай хот-щәгтым элалы рупитэв.

Нина Николаевна Копнован яныг пүмащипа лāvёгум, тав ляххалыт сāv мэхумн ёмщакв торгамтан щирыл, вёщкатыг



Т.С. Мерова

ос номтыңыг хансуңкве а́нумн ханищтастэ.

Тованакт ам мָньщи лятңыл ляххалыт 6с щё-питалсанум. Тот Евдокия Хозумова радиопередачат в́арим рупитас ос тав хоттальялнэтэ сыс нётсум.

Мёнамён Е.И.Ромбандеева мак лятңыт хулыглас. Тав лавыглас: «Айкве, наң школат мָньщи лятңыл хансуңкве ос потрыт ловиньтаңкве ханищтыман, тыи ёмас в́армалъ. Туп ань лятңыт ловиньтанэн порат букват нупыл сака ул сунсэн. Хумус наңки щань лятңыл юн потырталсын, та щирыл элалъ лятңыт акваг тотэн. Щар 6выл мָньщи передачам Е.И. Ромбандеева урыл щёпитаслум.



«Югория» нампа компаният сосса мэхум щань лятңыл передачат в́арнэ колнак хосат тагыл рупитас. Тот ханты лятңыл ляххалыт Евдокия Николаевна Вожакова щёпиталыс, сав тал Раиса Михайловна Хромова тот рупитас. Тав сака пумыщ потрыт мэхумныл ратива передачан хансыглас, такви турсуётыл сака нётнэг потыртас. Тав ань пенциян патхатас, мотусн вантлыс.

Тувыл Вера Егоровна Паньшина 6с рупитас, тав щань лятңе ваховский

хантыт потыртан щирыл 6лыс. Т6ва порат мот хантыянув таве ат торгамтасаныл.

6выл командировкан Когалым усн кетыглавёсум. Тот салы янмалтан ос в6раян х6тпат! Съезданыл 6лыс. Тувыл мён Татьяна Гоголева ёт акв матумпала 6йка салыянэ урнэ ман тотыглавёсмён.

Татьяна Степановна округ депутатыг 6лыс, ань муйлын колн щалтмумён порат ам мָньщи лятңыл пащалахтасум. Колың 6йка лягалас: «Тыи Татьяна Мерова ёхтыс!» Ам хот-6щатахтасум ос тав лавыс, сосса мэхум щань лятңыл передачат пуссын хунтлыянэ ос турсуюм тара ханьщистэ.

Хальус районул ялсум, тот мань павланувт савнун х6тпа маньщи лятңыл потыртасыт. Х6рыңпавылт Аксинья Степановна Мерова ос Дарья Степановна Анямова потранэн ратива мэгыс хансыгласагум. Сукырьят, Л6пмуст ос Кульпаст сав мэхум ёт вайхатым 6лсум. Ань та потрыт та хольт пуссын архивн хулытуптым 6лэгыт.

Ханты-Мансийск уст ам Юван Николаевич Шесталов такви стиханэ ловиньтаңкве в6виньталыслум. Овлэт тавёныл матрыг хурахлым 6лсум,



Г.В. Захарова ос Т.С. Мерова

номсасум, илттыг тақыщ потыртаңкве паты ке, ам китыглан лятңанум ул пуссын хот-ёрувлыянум. Насати, такем номтың элумх6лас, тувыл такви хот маньщи лятңыл, хот руц лятңыл потыртас. Тав т6ва передачанум хунтлым юи-палт лавыс, ман, Саквят 6лнэ маньщит, щань лятнунув мощ мот щирыл суйты. Нас тай потранув торгамтавет.

Мот маньщи поэт Андрей Семёнович Тарханов 6вылтыт стихыт ловиньтан руц передачат щёпиталсум. Тав ётэ акван-х6нтхатыгламум элы-палт акв стихе ханищтаслум. Номсэгум, тав элы-палэт ловиньтылум тах, вос в6гтэ, мэхумн стиханэ эруптавет. Тувыл тав ётэ потыртамум порат ханищтам стихум аты пыл номылматыслум. Тонт мот савсыр пумыщ тэлат 6вылтыт потыртасмён.

Кит тал ювле хулытум юи-палт ущ 6с акван-х6нтхатсумён, Андрей Семёновичин китапавёсум, хотты стихе в6глум ман ати. Ам хот-щ6гтым ущты та стихе ловиньтаслум.

Ты рупата сака пумыщ, ам савсыр мэхум ёт в6шинтахтасум, т6н ура-нылт потранум хоса ат

оигпи. Ань ос ративат аквёёт рупитам мэхманувн, кущаиг рупитан эквав Тамара Емельянова Сулягинан пумащипа латың лавёгум, нам-х6талэныл кастыл пуссын янытлыянум.

Татьяна «Персона» нампа руц радиопередачат урыл номылматас. 6выл передачан тав Андрей Тарханов Иван пыге в6виньталыстэ ос тав щаньяге-ащаге, Илья канке урыл потыртасыг. Ос китыт передачатэ в́арме мэгыс Татьяна Юван Шесталов Володя пыге в6выгластэ. Володя такви щаньяге-ащаге, Оринэ увцитэ ос мань пора 6лулсаныл урыл потыртас. Ётыл студиян акушерлёккарыг рупитан нэ Надежда Кирчика ёхталас. Тав Ханты-Мансийск уст сака сав нэквет ныврамыт самын патнэ порат нётыс. Рупататэ ёмасыг в́арнэтэ мэгыс тав мэгылт 6щнэ п6сыл майвес ос мирн ванэ намыл намаявес.

Ративат рупитан х6тпат пуссын ман 6с янытлыянув, пустагыл вос 6лэгыт, сав с6т, сав щунь. Ос мот журналистыт урыл потрыт элалъ хансуңкве патыянув тах.

Тамара МЕРОВА

Хоса-аныт нётнэг пёслыанэ

Салың колт
яныгмам хум
Егор Егорович Наков
ййвныл савсыр аныт,
таит, салың суныт,
ваңын суныт, товтыт,
пиным ёсат вәри.
Тав ётэ ам акв порат
Шурышкарский район
Ханты-Мужи мань
павылт хонтхатыгласум,
тот потрамасмён.
Тав мащтыр махум
фестивалин тув
ёхталас.

Ты коньпал касың туи
няврамыт тот ушлахты-
нэныл порат тананыл
хаништаңкве тув вёвыг-
лаве. Егор Егорович пы-
грищит ёргащлахтуңкве
ханищтыанэ, тән савсыр
ёнгынутыт вәрёгыт.

Егор омаге-әтяге салың
хотпаг олсыг, няврама-
нэн нёрт самын пат-
сыт, тот яныгмасыт. Тэн
лов няврам янмалтасыг.
Ушлахтынэныл порат
нәлув вагылсасыт, нәлумт
Порават павылт олсыт ос
Аст хул алыщласыт.

Ань Егор ты урыл тох
потырты:

– Мән яныгмамув по-
рат ят савсыр ёмас хул
блыс, атямёнтыл супыг,
мохсаң, усхул пувинтас-



Егор Наков Роза Экватэ ёт ты ёрнкол ёт тотылгә

мён. Ань ты хуланув туп
хурит сунсыглыанүв.

Егор Егорович Экватэ
Роза Тимофеевна, ханты
нэ, тав омаге-әтяге ос
салың хотпаг олсыг, акваг
колт яласасыг, сав салы
ошсыг. Тэн атимыг ёмт-
мён юи-пәлт пыганэн
нёрт яласасыт, салыт ош-
саныл, ань лавёгыт, нэм-
хотьютаныл ат яласы,
пussyн павылт олэгыт,
рүпитэгыт.

Егор Экватэнтыл лов-
мантем тәл Салехард
уст олэг, тот сосса махум
отделт рүпитэг, матыр-
әти щаквщег ос выстав-
кат суссылтым хот-әти
тётыглавөг. Тән касың тәл
Москва усн «Сокровища
Севера» вәрыглан мән
ялантэг, мань ёрнкол,
савсыр юнтым ос ёргим
пормасыт ёт-выгыг, тыхал
тыналыанэн, тыхал нас
суссылтыанэн.

Хум ййв сартуңкве
Питляр пәвлэн яланты,
тот олнэ колэт эрнэ пор-
масыгдөнщи, вөрнатхаты,
хотты ййв пёрии, хоса
аны вәрнэ магсыл ұльпа
ййв, хальйивсарты. Касың
пормас магсы таквисыр
ййв эри, касай налыт хальт
яныгман рёпацил вәри-
янэ. Колт ошнэ пормасыт
пussyн вәруңкве хасы,
талква пасаныт, улассу-
пыт. Вәрнэ хоса-аныанэ
тав нётнэг хансал, хурил
пёслыанэ.

Ам тав пөхёт унла-
хөлэгум, тав хаснэйвыл
хансат, уйхул хурит та
пёслы, ты мус ам ётум
потырты, хуриянэ татем
нётнэг тәлэгыт, тавён шар
нэматыр торас ат вәри.
Тувыл ййв шаритан төре
катын выг, хуритэ ос хан-
сат нётнэг та ёмтэгыт.

Егор Егорович ос Роза
Тимофеевна агииг-пыгыг
янмалтасыг ос акв сава-
лап няврам янмалтастән.
Ксения агитән такви
щёмьяң, ойкатэнтыл
акв пыгрищ янмалтэг.
Виталий пыгён школа
әстламе юи-пәлт Киров
уст ханищтахтас, ань юв
ёхтыс, омагён-әтягён нёты.
Виталий атятэ ёт матыр
ёрги манос сарты, акваёт
рүпитэг. Ксения оматән
юнсхатуңкве нёты. Нэг-
хумыг хотьютын матыр
манутыл манос порма-
сыл те вәрылтапавөг,
няврамыг акваг нётэг,
акваёт молях вәрапияныл.

Мән округувт ты тәл
маньполь этпост сав пә-
лыл салың махум касуң-
кве ёхталэгыт, тән Егор
Егорович вәрум хоса-
анытыл тах мүйлуптавет.
Ты мащтыр кәтуп хум тав
сав хоса-аныт вәрыс ос
хорамыл пёслысанэ.

Мән махманув пёс
порат матыр-әти pussyн
тәнти вәрсыт, хум хотпат
сагырхатсыт, ёрыгхатсыт.
Нэквет щёмьяныл мас-
тысыт, мольщаңыт, сахит,
вайт, нярат pussyн тәнти
юнтсыт. Ты кастыл юнтым
хорамыт тәсыг ошсыт.
Егор ань ос касың пор-
масэ магсыл ййв сартын
сөпаслы ос хотты семи-
нарт манос выставкат
ёрыгхатым, пёслым унла-
хөлы, махум тавётыл ос
тав пормасанэтыл пүм-
щалахтым ёмыгтэгыт.

Галина КОНДИНА



Е.Е. Наков хоса-аны сәгри

Тав кит мāt хōнтлыс



Пётр Егорович Вынгилев



П. Е. Вынгилев орденэ

Хальүс район Няхлаң пāвил мāньщи хум Пётр Егорович Вынгилев кит мāt хōнтлыс – Советско-финский ос Великий Отечественный войнат.

Тэлы хōнтлын вāрмаль

Советско-финский хōнтлын вāрмаль мōт щирыл «Зимняя война» лāваве. Ты нак 1939 тāлт яныг таквс этпост ōвылтахтас, 1940 тāl мāньполь этпосэ мус ōлыс. Тōнт СССР тармыл пуңктотнэ мāхум ōлнэ мāнаныл вуянтасыт, Финляндия мā лōмтэ хотвиңкве лāvсыт, Ленинград ляпат ул вос ōлэгыт. Кūщаянув пилсыт, ань сака ляпат ōлуңкве патэгыт, ōлнэ мāv вуянтаңкве тах ат вёрмилув. Финн мāхум ōвлэт ат кāсащасыт, СССР мир эт хōнтлуңкве тўлтхатасыт. Тувыл воритотнэ мāхум ёмасмахтасыт, финныт Выборг ўсаныл СССР нупыл хассаныл, ос мōт эрнэ нэпакыт щёпитасыт, тув кātпосаныл тўщтысаныл. Та хōнтлын вāрмаль тох та ойгпас.

Яныг хōнтлын вāрмаль капай

Тāl котиль этпос 27 хōталэ – День воинской славы лāваве. 1944 тālт ты хōталт Ленинград ўс блокадатэ пāлыг-пўсвес.

Та ўс мир китлерытн 872 хōтал тэтāl марылтавёсыт, пōльтвёсыт. Тōнт тот сāv мир холас.

Мāньщи хум Пётр Егорович Вынгилев та порат Ленинград ўс вуянтым ты хōнтлыс.

Няхлаң пāвил хум

Пётр Егорович лўпта этпос 20 хōталэт 1920 тālт Няхлаң пāвилт самын патыс. Атятэ вōраяс, хўл алыщлас. Пётр сāt класс āсламе юи-пāлт кино-механикыг ханищтахтас, тувыл кинат суссылтым мāнь пāvлыт халт яласас. Кāркам пыг кўщайтн кāсалавес, Ленинград ўсн сосса мāхум ханищтахтын институтн кётвес. Тот 1936-1939 тāлытт ханищтахтас. Та пораттав А.С. Пушкин «Станционный смотритель» потре ос В.И. Ленин ōйка хансум потранэ мāньщи лātңыг толмашласанэ.

Хунь Советско-финский хōнтлын нак ōвылтахтас, мāньщи хум тāра хōнтлуңкве вуйвес. Та тāl сака ащирмаң ōлыс, атпан арыг градус мус ёхталас, тох та хōнтлысыт. Хōнтлын вāрмаль

ойгпаме юи-пāлт, тав мōртым мāн, Адлер ўсн, лусытаңкве кётвес. Тыт ащирмаң ōлыс, тот ос сака рёгың, ты паттат тав агмыл ёмтыс, юв тāртвес.

Яныг хōнтлан вāрмаль ōвылтахтаме порат, 1941 тālт лўпта этпост, Пётр Егорович Ленинград ўст иң ханищтахтас. Хōнтлуңкве тāра та тотвес. Ленинград ўс ляпат 75 стрелковый бригадан ликмыс. Блокада пāлыг-пўнсыматэ юи-пāлт, бригаданыл аквта тāра мōт мāн кётвес.

Украинский фронтыт Бела Церковь ўс ляпат мāньполь этпос 10 хōталэт тав сакватавес – саме, сысэ ос ёмаспал лāглэ нялн хōйвёсыт. Өвлэт госпитальт пусмалтавес, тувыл юв кётвес.

Пётр Егорович Хулюм-сўнт пāвилн ōлмыгтас, нэпак ловиньтан колнак кўщайг паттувес. Ётыл Кульпаст хўл алыщдым ос вōраим рўпитас. Өвил экватэ эт онтолов нйврам янмалтасыг. Экватэ холаме юи-пāлт тав мōт нэ тотыс, ты колтāглыт ос хўрум нйвраманэ самын патсыт.

1985 тālт Пётр Егорович Вынгилев фашистрицит эт хōнтламе мāгыс, мātэ вуянтаме мāгыс Великая Отечественная война I степень нампа орденыл майвес. Өйка 2003 тālт атимыг ёмтыс, такви мātэт ёл-щёпитавес. Нйвраманэн ос апыг-рищанэн тав номаве, сāv ёмас тэла вāрме мāгыс мирн янытлаве ос кāсталаве.



П.Е. Вынгилев экватэ ос Нина агитэ эт пōслым ōлэгыт

Любовь Вынгилева, Хальүс.
Мāньщи лātңыг **Светлана РОМБАНДЕЕВА**
толмашластэ

Няврамыт тәнки потранылы ловиньтасыт

Хальүс район Хулюмсүнт павылт няврамыт магсыл «От ремесла к искусству» наппа научно-практический конференция тал котиль этпос оигпам элы-палт онтоловиттыг вәрыглавес.

Тамле вәрмалы школа искусств-колт няврамыт ханищтан нэ Надежда Константиновна Маслова касың тал щёпиталытэ. Ты тал аквхуйплов няврамыт тәнки хансум потранылы ловиньтасанылы. Тән хурум тема щирыл потранылы хассыт: «Традиционная художественная культура», «Исследования в области изобразительного искусства», «Экология или вторая жизнь отходам».

Ты юи-палт няврамыт халанылт мащтырлаңкве ханищтахтасыт.

Таисия Рядькина сапса вәруңкве ос поналнылы квалгыт сагуңкве няврамыт ханищтасанэ. Каролина Алгадьева пёс нэ-



Халанылт ханищтахтэгыт

пакнылы савсыр эрнэ пормасыт вәрыс. Ксения Шмониная пёс кумыскалы хусапыт хумус вәруңкве рөви – няврамытын суссылтас. Эвелина Борисовна төр-лөмтылы нётнэ сакв-квалыг вәрыс. Елена Ушаковна ос Анастасия Шмониная төр-лөмтытылы лэпта юнтсыг.

Няврам ханищтан нэ Надежда Константиновна Маслова ос Татьяна Андреевна Головина конференция кастылы «Изделия, изготовленные из предметов вторичного использования» руш латңылы намаим суссылтап щёпитасыг.

Эксперт-хөтпат няврамыт хансум потранылы

хөнтлысанылы ос щар мак ёмашакв, пумащиг хансум потыр пёриясыт. Төнт тән лавсыт, сака ёмас потыр Дарья Шевченко, Полина Алгадьева ос Кристина Алгадьева хассыт. Кит мәнщи агиг «Окрашивание ровдуги у северных манси» наппа потыр хассыг. Потрөн «Мүтраң маңквлакве» (Мудрый совенек) касылы Хальүсн ань тах кётаве.

Конференция рупитам порат Хулюмсүнт павылт олнэ хөтпат янытлавёсыт ос диплом-нэпакылы майвёсыт. Тән няврамытн «Йис павлыт олупса» наппа касылы магсыл потрыт хансуңкве нётсыт. Ты касылы 2021 талт «Лүймә



Муйлупсал майвёсыт

сэрипос» ос «Ханты ясаң» газетагт рупитан махум вәрыгласыт.

Ам Надежда Константиновна Маслован, Татьяна Андреевна Головиная ос Ольга Владимировна Ручейн яныг пумащипа латың лавёгум. Тән сака эрнэ рупата вәрёгыт ос няврамытын пумащ потранылы хансуңкве нётэгыт ос ты конференция касың тал щёпиталэгыт.

**Наталья
ТАСМАНОВА,
Хулюмсүнт павыл**



Няврамыт янытлавёсыт



Конкурс магсыл нэпакылы майвёсыт

Ёмас пыгрищакве

Хальүст национальный культура
Центр кол җы, махум тот 1991 талт
рүпитаңкве җылтахтасыт.

Ётыл тав «Берёзовский районный дом культуры» колн тұлвес. Тот ань тамле колнакыт рүпитәгыт: «Истоки» нампа колтагыл, «Маа Сым» колтагыл, «Рутна хот», «Юный мастерок» нампа нъяврамыт щакв-щин тэла, «Союм» нампа театр ос «Ма мувем» эргын-ййквнэ ансамбль.

Ам ань акв ёмас, кәркам ханты пыгрищ җылтахтасыт потыртаңкве таңхөгум, наме Егор Новьюхов. Тав Хальүс школат 6 классыт ханищтахты, культура колн яланты, тот матыр-әти вәри. Нас сусылтан манос ёнгасан магыс сыре-сыр пормас мащтырлаңкве хасы – лагыл маснут ёнты, алыщлапыт, колыт, та маныр. Ты коньпал пыгрищакве

ханты ййквыт ййкви ос товтыл хайтыгыт.

Егор сәв эрнэ тэла вәрнэтэ магыс 2020 талт Хальүс миркол пәлыл, культура комитетныл Почётный грамота нэпакыл майвес. Ос хунь тымат пылыщмаң агм нэглапас, мән ищхйпың ут хосыт рүпитаңкве патсүв. Егор җс мән ётув юрцигпахтас, ты тэла молях ханищтапастэ. Тав ань «Счёт до 10» нампа кина-охса сусылты, ханты ләтңыл цифрат урыл потырты.

Мән Егор җс янытлылүв! Пустәгыл вос җы, Элал җс сәв эрнэ тэла вос вәри!

Хальүст җлнэ национальный культура Центр кол кұщай нэ **К.А. Супрун** потре маңыщи ләтңыг **С. РОМБАНДЕЕВА** толмащластэ



Өлнэ мам урыл

Паща җлән, ам намум Галина Дунаева.
Ам маңыщи, Ивдель үст самын патсум,
маңь порат Лэпла пәвылт җлсум. Лэпла-я
Ханты-Мансийский автономный округ ос
Свердловский областыта ови.

Лэплат Тасманов кит щёмья җлэг, ам анёквам мисыт, кроликыт җныщас, туи порат үит магыс пум тосласүв. Мән тувыл мот мән вәнтлысүв, үс мос ләглыл сака сәв вёрыста ёмантаңкве эрыс. Хүрум хотал рүнт ёт ёмуңкве сака рупатаң. Ань тот акв щёмья ос ам канкум Коля Тасманов җы.

Ётылнув мән Ушма пәвылн вәнтласүв, тав Свердловский областыт җы. Тыя пәвыл вөр кйвырт җы, хумыс ләваве, цивилизацияныл хосат. Лильпи технологият мән палтув җс ёхтасыт. Туи порат ёхталан махум ос сосса махмыт ялантэит хул алыщлаңкве, вёраяңкве, пил вәтуңкв ос нёрна ёхталәлэит. Кәсың хотпа хонты таквинәтэн кәс вәрнэ вәрмал.

Мән щёмьявт җлэв ам, щәнюм, кыгчим, яйрищум, Валера яйлаңум. Яйрищум ханищтахты

Полуночный пәвылт 11 класста. Туи порат каникулна юв ёхты. Хул алыщлан корабликыл хул алыщлаңкве эрупты. Кораблик – тай кәтыл вәрнэ пормас, тәвётыл хул пуваве.

Пәвыл пөхит җлэит Нёрыт, мән җлэв Нёрыт ляпат. Ляпат җлэит тамле нёрыт: Перевал Дятлова, Мәньпупыйнёр, Стортен ос мотаныт. Свердловский областыт җлнэ маңыщит эруптэит нёрта үщлахтаңкв. То махманувтыт Хоса ят ос Посар ят хул пувинтэит, ты Унтя ос Коля.

Нёрта сака хорамиң уруңкв хотал ёл-үнтнэ ос нөх-нэйлын пора. Тыг ос акв ювле ләйлыл ялантэв. Тэлы порат махмыт пурка ёнтэит, җлнэ хотал кус хунь мот хурип. Мән палтув ащирма. Вёраян хумыт ялантэит вёраяңкв. Тох ты мән махманув тот җлэит.

Галина ДУНАЕВА



Егор Новьюхов

Лүймә сәрипос

(Северная заря)
№4 (1262), 24.02.2022
Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Директор, гл. редактор -
Динисламова С.С.
Телефон (3467) 33-36-82

Заместитель директора –
Кондина Г.Р.
Телефон (3467) 33-22-72

Ответственный секретарь –
Узель В.В.
Телефон (3467) 33-23-09

Адрес редакции и издателя:
628011, г. Ханты-Мансийск,
ул. Комсомольская, 31
тел./факс (3467) 33-17-52

Е-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:
ООО «Новости Югры-
Производство» г. Сургут,
ул. Маяковского, д. 14.

Индексы **04399, 54399**

Тираж **1710** экз.
Заказ **758**

Цена свободная

Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной

службы по надзору
в сфере связи,
информационных
технологий и массовых
коммуникаций
по Тюменской области,
ХМАО-Югре и ЯНАО.

Свидетельство
о регистрации
ПИ №ТУ 72-00795
от 23 января 2013 г.

12+

Мāхум кумысканыл мāхар вāрсыт



Алёна Черкашина хуриянэ суссылты

Сāвсыр пūмыщ пормасыт вāрнэ мāнылат нэ Алёна Черкашина Белоярский ўст самын патыс, тот яныгмас. Таве Ханты-Мансийск ўст мāщтыр мāхум мирхал хōнтхатыглапаныл блум порат вāслум.

Алёна тот мāхум кумысканыл мāхар хури вāрунқве ханищтасанэ, тэлатэ рущ ширыл тох намаим блыс: «**Авторский практикум «Мозаичная архаика»**». Ты кāркам нэ ёт потрамасум, тэлатэ урыл пūмшалахтасум. Тав лāвыс:

– Ам мāнътāгыл кāтыл щаквщунқве патсум – рāкт-āныт вāрсум, мōт

матыр рāкытныл пōщгысум, хурит пōслысум. Хунь 14 талум тōвлыс, Ханты-Мансийск ўст блнэ Центр искусства колн ханищтахтунқве вуйвёсум.

Тувыл Санкт-Петербург ўсн ми́на́сум, тот институтт дизайнер тэлан ханищтахтасум. Аквта торыг рāкт ёт рўпитасум, рāкт-āныт ос пўтыт вāрунқве патсум.

Ётыл мозаика тэла урыл хўнтамласум, ос тув вуйхатасум. Овлёт Санкт-Петербург ўст Мозаика школат ханищтахтасум, тувыл Италия мāн ми́на́сум, элаль тот ханищтахтасум.

Ювле ёхтумум ю-пāлт, э́рнэ пормасыт ёвтсум, тōва утанум э́лыл хасылтасанум, кётвёсум. Тувыл акваг матыр-āти вāрунқве та патсум. Ханты-Мансийск ўст ань амти янас кол о́ньщётум, «ARTROOM» намаяслум. Тув янге-мāне ёхталэ́гыт, ханищтыя́нум, пуссын акваёт мāщтырлэ́в, пōслэ́в, ю́нсхатэ́в.

– **Сустёмт, тōва пормасын сосса мāхманув хорамыл вāрим о́лэ́гыт. Мāн олупсав улпыл о́с мо́щ вāглын?**

– Хумус ат вāглум, ам лўимāт самын патсум, ханты ос мāныщи мир халт олсум, яныгмасум. Нāн культуран ам сака э́руптылум, ань тыт хурия́нум ос сыре-сыр открытканум суссылтыя́нум, тōваныл лўимā мир хорамытыл пōслысанум.

Ам ё́рнколн ялантāлсум, тот сосса колтāглыт палт мўйлысум, сāв щёс

э́тхўлсум. Суссум, хумус о́лэ́гыт, рўпитэ́гыт, мāщтырлэ́гыт, тāн палтаныл ханищтахтасум. Ямал нупыл о́с ялсум. Ань сосса мāхум халт ам сāв юрт о́ньщётум. Ты мāгыс номтум сака ё́мас, тāн олупсаныл урыл нас хунь хўнтамласум манос нэ́пакт ловиньтасум, амти ё́машакв вāглум.

Ань вāрнэ пормасын ос кāтыл пōслум хурия́нум хосыт пуссын нāнқи, лўимāтем хумус э́руптылум, сосса мирыт олупсаныл ос культураныл сака янытлыя́нум.

– **Тамле хорамыл кумыскат хōтыл выгын?**

– Ты кумыска хурип āхвтас-саквыт – ты мрамор ос смальта. Тамле пормас ам Санкт-Петербургы́н манос Москван хасылтāлэ́гум. Тāн тот заводыт вāравет – кумыскат акван-атавет, исум кўрын пинтлавет, акван-пётавет, тувыл пāйтавет. Хотты лōмт ёвтэ́гум, мāниг сартыя́нум манос рāтащлыя́нум.

Ам ань тыг йильпи ширыл вāрнэ кумыскат тотсум, тав лававе: «модерн». Ты лōмтыт āти аквхурипат, тāнаныл сāвсыр ширыл пинтлу́нқве рōви. Мōт мозаика ос тох лāваве: «классический». Та лōмтыт ос пуссын акв янытат, кāсыңаныл нила сām о́ньщи. Тамле мозаика хурит ялпынқолт вāравет.

Алёна потре сака пūмшиг блыс. Ань вāрум ханищтапёт мāхум мāхар хури вāрсыт. Мāщтыр нэ атхатыглам хōтпат янытласанэ, лāвыс, тав палтэ вос ёхталэ́гыт, мōт сāв тэлан ханищтыя́нэ тах.

Светлана
РОМБАНДЕЕВА



Мāнылат нэ мāхум ханищтыя́нэ



Хāльўс ос Белоярский район нэ́квет мāхар хури вāрэгыт